

鄂

州

小

集

鄂州小集

今上以聖神廣運之治聲教誕敷章于雲漢經術文章
稱極盛矣迺崇儒重道異數便蕃而尊揚朱子也尤至
朱子吾新安產也集有宋諸儒之大成表彰六籍大道
丕顯至摛辭綴翰不獨兼擅歐曾王氏之長直追漢唐
而上顧平生所亟推爲文有經緯而遜謝弗及者則又
同鄉之羅鄂州卽鄂州之文可知已嘗論古今文章之
事代殊歲積要惟原本經術而後能明體達用論世而
知人舉夫明而禮樂幽而鬼神邇而民生日用飲食之
恆遠而天下國家之繇且變鉅而虞夏殷周已來盛帝

喆王制作之遺法微而昔聖昔賢所未白之隱念與所不忍遽白之情莫不發揮旁通以正人心維風俗昭被於無窮而不侔於浮華無根之譚暫炫一時訖就澌滅如爝火之末光電影之餘照焉而始可謂之經緯之文蓋六籍之書譬諸日月之麗天珠連璧合燭八紘而徑千里若夫燦然三垣之外環列于四方者悉儲精陰陽輝映終古而與二曜並垂宇宙閒故曰五星爲經二十八宿爲緯凡文之原本經術者皆是而鄂州固其最著者也乃當日以所存僅止於此而惜之而目之曰小集

不知文之大小分於經術之淺深而不係乎卷帙之多
寡鄂州之文貫幽明括遠邇微無不晰鉅無不舉雖見
諸施行者未盡其用而精理爲文秀氣成采明星列宿
永堪日月爭光而經緯天地奚翅元黃繪繡備黼黻之
大觀已邪而又何小之足云彼高頭巨軸盈尺等身詡
詡然以著述自期者豈少哉未幾燭火電影同歸無何
有之鄉矣以視鄂州其相去爲何如也原集五卷前宏
治中刻於裔孫文達洊更兵燹流布漸稀余特取舊本
校讎補綴授諸剞劂以廣其傳俾識吾新安經術文章

淵源有自而鄉里後進之士當務敦尙實學張皇大業
益用以鼓吹 昭代之休明而先正之餘韻流風長以
不墜由朱子之語而深味鄂州之文并由鄂州之文而
益沈潛反覆於朱子之微言奧義卽曠百世而可以相
師毋蹈以鄭君爲東家邱之誚而甘爲西家之愚夫也
是則余區區輯錄之私心也夫同里後學程哲纂於七
畧書堂時康熙癸巳立秋日

羅鄂州小集原序

文章與天地相爲終始視世道之升降而盛衰者也蓋
自夫天地旣判三辰順布五行錯出其文著矣伏羲畫
卦而人文始開文王贊易而文益備矣及夫兩漢二馬
楊班或以紀載事蹟著於策書或以述頌功德刻之金
石文章之作始濫觴矣自是而降一代之興必有一代
之制而文章亦由是而見焉豈惟足以傳其事功因以
觀其治亂故唐之盛則稱韓柳宋之初則有歐蘇南渡
以來又世道之一變也見稱於時則有吾州二羅公焉

六朝五季蓋寥寥乎無聞矣然則三代而上聖賢迭興
其所述作尊以爲經不專於文章而不能不文章兩漢
而下文人才士相與論著流而爲史必工於文章而後
能文章今之文章兩漢之謂也大羅名頌嘗知郢州小
羅名願嘗知鄂州鄂州之文尤爲縝密古雅惜其全集
不傳今行於世者鄂州通守劉清之子澄之所刻蓋鄂
州旣終於郡子澄因以所見裒集成書號鄂州小集視
其大全蓋什一耳歲月旣久小集亦不復存予嘗得之
於藏書之家讀而愛之乃謀刻之梓以廣傳布從予游

者洪氏之兄弟曰斌曰杰曰宅鮑氏之叔姪曰元康曰
深樂以其資共成之而請予爲之序予聞諸先生長者
南渡後文章有先秦西漢之風新安二羅其人而淳安
社壇記尤爲世所稱頌以予觀之陶令祠堂記張烈女
廟碑理嚴詞暢讀之如登軒陛而聞鍾呂之音至於論
成湯之慙德則所以發千古聖賢之心明萬世綱常之
正者爲何如哉宜其稱於當時傳於後世也但朱文公
常欲附名集後卒不及有所論作顧予何人而序其首
此則鄂州之不幸而予之大幸者也因爲上下天地經

史之文古今盛衰之變使讀者知其所自而不苟焉是亦爲學之一助也鄂州字端良號存齋乾道二年進士師山鄭玉子美謹敘

右鄉先達宋朝奉郎權發遣鄂州軍州事羅公文五卷權通判鄂州軍州事臨江劉公清之所編次公與劉公同官於鄂公旣卒官劉公因以是編刻寘郡齋於公平生所著不能十一故題曰小集其藏於家者餘五卷不幸一再傳而中絕遂俱亡矣惟新安志爾雅翼二書吾郡嘗刻諸梓此小集者郡人亦嘗再刻之故家有其書

兵火後板本旣弗存三書皆不易得矣訪避地還藏書
多散失求小集於友人又得鄉先生陳公櫟所傳本而
正其疑謬顧二家本皆前闕篇目乃爲敘錄如上宋南
渡後士大夫經術政理無愧東都惟文辭若與世俱降
者雖能言之士參立角出各名一家高文大冊照耀先
後而慶厯元祐之風軌邈不可追矣公之爲學自三代
制作名物帝王經世之迹古今治忽之變下逮草木蟲
魚之隱蹟博攷精思靡不淹貫起歐陽王曾氏上接漢
秦求其合作而斟酌劑量之故其爲文質厚中正而節

度謹嚴本人倫該物理關世教而未有無所爲而爲者
使天假之年恢廓光大見諸設施議論風旨自本朝而
達天下則韓歐諸子所以彌綸紹代者赫然復見於當
時夫豈至於散落僅存如今所傳而已然則劉公旣深
哀之而子朱子每見其文輒推讓之比聞其卽世而歎
息之者其不以斯歟公早歲嘗以廕授京官矣考滿歸
卽請祠旣第進士得縣矣復請祠越五載乃起倅贛州
旣滿歸又七年乃得郡其於進退取舍之際如此志之
所存何可量也而天固嗇之則當世君子所以重爲公

惜者豈惟以其文哉雖然公之於文則有道矣公嘗論
儒者之學去己之私以盡其所受之分以施於上下親
疎之際前聖有作大經大法皆具今之學者亦求合於
彼而已其有不合者積思以通之汰去浮游散越之念
而日就親切忽不自知其合矣嗚呼昔之以文名家者
蓋未嘗及此也以公學於古人而反求諸己者類得其
要如此於文辭其有不合乎讀公之文者試以此言思
之公諱願字端良號存齋劉公字子澄後鄂州卒一百
八十一年甲午歲十一月日南至休易龍源東山趙沔

子常謹書

羅君傳道鄂州使君七世諸孫也將赴官洪之靖安
使其表弟汪弁奉寫本鄂州小集來校其闕誤將刻
諸官舍泐以所藏本證之去其續編之弗類者而補
其闕逸以還劉公之舊昔四明王公伯厚以博洽名
一世守吾郡時於鄂州遺書尤致意焉嘗與郡人方
公萬里求諸羅氏得爾雅翼而刻之學官其雜著則
舍劉公所編外片言不可復得矣況茲再更變故也
乎併錄所序編目以歸之嗟夫吾郡先達如金忠肅

程文簡汪龍溪吳竹洲方秋崖呂左史諸公文集失傳者多矣亂亡之餘安得子孫皆如傳道之克自樹立以世其家而因得重刻家集以廣其傳乎舊題後十有一年八月幾望訪再書

壘以戊子之夏哭雍郡虞文靖公於崇仁遂得與新安趙子常定交於哀弔之頃別後子常惠書言有鄉先賢羅鄂州小集一部留他友處相遺以爲好久之其人弗果致越十有八載而鄂州七世諸孫傳道來爲丞於江右之靖安則子常之姻友也予以流寓南昌因得會語

詢及鄂州集則兵後刻本亡矣傳道早夜兢兢焉惟先
世遺書泯墜是懼求訪抄寫得所爲辭賦古律詩雜著
記序行錄誌銘碑箴祭文題跋奏劄表牋書啓等凡九
十二篇釐爲五卷迺出其囊中寫本以見示且俾爲之
校讎將再刻於梓壩敬受而伏讀之慨然有歎於前代
文獻之盛也鄂州諱願字端良初以世澤得官後登乾
道二年進士第終於朝奉郎權發遣鄂州軍州事其厯
官多善政其爲學則自幼居家庭時以父兄爲師友觀
其所序古今長者錄可以窺其養德之有數也蘊蓄充

溢本末兼具礪磨灌漑時而出之故其所著皆有以關
世教厲風俗追古作者而無愧其所攄發必勾深致遠
曲折條暢盡達其意之所欲至而後止其賦咏則又擬
楚音而宗杜陵非若文苑之士挾偏長以鳴於世也其
所告於君相者又皆忠愛之辭有遠慮而無忿激之弊
與夫草茅疎闊於事情攘臂以談恢復於南北休兵講
好之日者又不同矣宜乎在當時則子朱子歎美而敬
服之卒於官則劉公子澄裒遺藁而亟刻之非徒以鄉
里與同僚之好也然劉公名之爲小集者已恨不得其